

مَيِّتِ الراحوا عَنْهُ أَحبابه وهله
ومَوْتِي من صاحوا وصل موكب كربله
حائرة ابّابي ابليا أحبابي
وصل موكب كربله

+++

حايّره اباب انتظاري وشايّله حزن الزمن
ابصدري مكسوره الأمانى چنه صدر أم الحسن
ليوم يلفون الحبايب باچر ايرد الضعن
ومحسن آمالي تهاوى ابخيبة آمال الوطن
من مشوا وأنا ابسفر عيني معتاده السهر من يوصل لي خبر لو علامه
لو غفت عيني غصب يظل قلبي عالدرب يحلم ابموكب يطب بالسلامه
طولوا عني الحبايب في سفرهم
و أنا أحسب دمعته دمعته وانتظرهم
أنطي عيني للبشرني ابخبرهم
وأنطي عمري بس يرد سالم عمرهم

اعطوني لبشاره وَلو يا حبابي وَلو
وعيني محتاره وصلّوا ما وصلّوا

والسهم جاني ابقلبي ناداني
وصل موكب كربله

+++

وينه لمفارق حبيبه الحالي وحده يفتهم
ما يحس بالجرح إلا المنجرح عنده العلم
وأصعب آلام الفواقد هاللي قلبه ينلجم
لو يشوف أحبابه مرّة ويصحى لن هذا جلم

والمدينه الثاكلة بالمشوا متزلزله البيت إذا راحوا هله قبر چنه
بيت ايموت امن الوجل بس يعيش اعلى الأمل ومن يردون الأهل چنه جنة

يعني ما أرتاح لحظة في حياتي
شايف الأم عالضناها من تحاتي
هالوجل متأرجحه ونيل أمنياتي
و صوره أحبابي تلوح اكل جهاتي

غامت اعيوني بالمدامع يا هلي
و شابت اسنيني من رحت يابو علي

وش خبر طيبه ؟ بعد هالغيبه
وصل موكب كربله

+++

بس فتحت آذاني مره وجتني أخبار السفر
قال ردّوا قلت ردّوا ؟ ماني امصدقه الخبر
يعني عبد الله ورقيه وبو علي خير البشر
بعد طول الغيبه ردّوا كفو يعيون القمر

عندي للأكبر علي نذر من يرجع إلي اشلون إذا عاد الولي بالسفينه
وعندي للجاسم عرس وللقمر تحلى الشمس وترجع أفراح الأمس للمدينه

عادت الفرحة اللي عني غيّوها
وطيبه توهم هالحبايب طيّوها
وتبتسم أم البنين العذبوها
وتفرش الطفلة المصلاة الأبوها

يعني الغالي رجع لعيوني رجع
وحيل آمالي من وصلهم ما انقطع

ابليلي وانهارى أجمل أخباري
وصل موكب كربله

+++

صرت أخاف من البشائر تنقلب لحظه الترح
قلبي من كثر المصايب ما تعود عالفرح
قلب عندي في حياتي مو فرد جرح انجرح
السعد يمكن كسرتة وليّه بأفراحه سمح

هذي أحوال العمر عسر من بعده يسر الحمد لله والشكر عالسلامه

اشقد سواف تكتب من تلاقي اللي تحب والله حنينا إلچ يا ابتسامه

بحجي للغالي عن الشوق اللي بيه
طوّلت هالغيبه يا روح الزچيه
وشوفتك يا بو علي فجّت عليّه
بعد لا اتروحون دوني غاضريه

اخذوني وياكم لوسفر ثاني حضر
بعد من غيري ماكو يالغالي سفر

حنّوا اعلّيّه صبر ما بيه
وصل موكب كربله

+++

من شفت زينب غريبه ومنها نحلان الجسد
چنها خيمه اعلى اليتامى خيمه ما بيها عمد
قلت يا ستار راحوا ما بقى منهم أحد
وچان راح احسين ويلي ما صفى بعده بعد

قالوا ابعون البدر عظم الله الأجر طاح دامي ومعتفر قلت وحسين؟
قالو استشهد بطل جعفر الغالي رحل قلت يفداه الأهل بو علي وين؟

قال عبد الله الولد جثه صريعه
قلت وين احسين وعبدالله رضيعه؟
قالوا العباس من فوق الشريعه
عينه مصيوبه اوچفينه قطيعه

فدوه عباسه وفدوه آني أنذبح
بو علي راسه قالوا ابراس الرمح

ويلي عالغالي ابضيعة آمالي
وصل موكب كربله

+++